

ЗЭЭРДЭГШЭН ШОНО ХОЁР

Намар тээшэ боложо, хүни зунайхиһаа уташаг, харанхышаг болобо. Унагатай гүүдые хүниндөө хашаа соо бүхөөр хаадаг болобо.

Нэгэ үдэшэ Зээрдэгшэн унагатаяа хээрэ үлөөд, унагаа дахуулаад, гэрһээ холо бэшэ бэлшэн ябаба. Тэрэ үедэнь үлэн шоно талаар зайжа ябаһан байгаа. Тэрэ шоно үнинэй юумэ эдеэгүй, үлэн хоһондоо шүдэнүүдээ табжагануулна.

Гэнтэ унаганай нарииханаар инсагаалхые дуулажархиба. Шоно зогсон шагнажа, агаар унхидаад, унагатай Зээрдэгшэнэй ябаһан газар руу гүйшэбэ.

Шоно хэмээхэнээр маряан дүтэлбэ. Бүри ойртобо, үшөө нэгэл харайхадаа, унагыг саб шүүрэн барихаар болоод байна. Шоныг Зээрдэгшэн мэдэжэрхөөд, агаар унхидан шуухираад, шанга гэгшээр инсагаалжархиба. Унаганиинь хажуудань аһан шадалаараа гүйжэ ерэбэ. Зээрдэгшэн унагаа бэээрээ халхалан зогсоод, шоно тээшэ хойто хүлнүүдээ залаадхиба. Шоно нүгөө талаһаань гүйжэ оробо, харин Зээрдэгшэн хойто хүлнүүдээ тэрээн тээшэ баһа залаад лэ, тахатай туруугаараа шоныг үдхэлжэрхибэ. Шоно үбдэнхэндөө улиба, теэд эдихэ дураниинь хүрэнэ. Зээрдэгшэниие тойрон ябажа, юушье болохоор бэшэ хэбэртэй байхадань, ой руугаа орошобо.